



聖宗名賢五百家播芳大全文粹卷第十九

謝表

謝除資政殿大學士表

韓魏王

臣某言三班借職劉仲舉賫到官告敕牒各一道伏蒙聖慈授臣資政殿大學士仍賜對衣金腰帶鞍轡馬及奉聖旨不許辭讓者賞既優而未諭蓋省無勞讓雖至而復當固非獲已惟進退之難處在斯須而弗安中謝伏念臣才本無他志期有立嘗覽古人之

忠義以至於涕零矧逢真主之聖明是堅于死報山
海之大何益犬馬之誠則然故入贊樞机必乃情于
萬務出居屏翰亦盡力于一方圖富貴豈臣之本心
窃祿位是臣之深恥惟茲守塞僅甫踰年徒能兵革
之墮驕無以救民之利敝過為之慮動則幾于濶踈
苟幸其安日可須于罪黜豈謂伏蒙 皇帝陛下天
地之度堯舜其仁謂內外雖殊孰差于輕重簪履至
賤尚惜于墜遺乃眷舊臣咸均寵數不圖庸近亦玷

褒榮重躋祕殿之聯寔駭愚儒之守避焉而弗獲其
請受焉而莫得其名再叨慈宸則有飾危背時之謗
遂塵美職則有無功冒進之譏與其違衆而取嫌曷
若被恩而思效偃倭承命慚羞在顏臣敢不服夙夜
之勤副國家之遇方垂無事奚由奮勇以答君鼎鑊
在前誓不臨危而變節臣無任云云

奉文謝除資政殿大學士表

一字之褒仰承明訓十旬之內再沐誤恩懇辭莫效

于精誠祇命惟增于戰慄臣某中謝伏念臣逢時過
幸受寵居多積邱山未報之私無毫髮可論之效豈
不曰知難而退悼此志之未伸固嘗懷見義必為
餘生之何有矧茲黜虜方正嚴誅太原北伐之師
惟期于殄滅保洛東都之衆可無待于撫綏自省何
勞能當異數茲蓋伏遇 皇帝陛下務存舊物駕御
羣材視臣鄰如股肱蓋欲奔趨而從事以爵祿為砥
石又將磨勵以勸功重假衰殘申加獎飾佩景德升
班之意敢陪近弼之殊榮追修文創始之名愧諸儒
之極選雖期隕首莫稱所天

謝除資政殿大學士表

張全真

心勞政拙宜在譴訶德厚恩深猥叨擢序採居官之
薄效陞秘殿之隆名薦控忱辭莫回聰聽終覩顏於
虛受但刻骨以知歸中謝竊以學士之有大名儒臣
之最高選景德創制示舊弼之殊榮康定限負見先
朝之慎簡如臣質衰蒲柳景迫桑榆無牧民御衆之

才第知不擾有愛君憂國之意其實甚踈葢然橫草
之勞行矣及瓜而代曩興誓急莫効馳驅虜在目中
料敵愧伏波之略錢流地上理財謝劉晏之謀僅知
謹于官常期不違於德意敢圖簡眷遽沐褒遷茲蓋
伏遇 皇帝陛下勵精以圖中興廣覽以收衆智謂
蠻夷未免於猾夏每勤勸功故名器有時而假人靡
嫌從予遂令駕劣亦玷寵光仰睿訓之過優體聖心
之所屬循名責實未知塵露之酌居寵思危第謹淵

冰之戒

謝除資政殿大學士表

錢參政

解繁機而宅牧重媿罔功聯祕殿以升班更叨申命
弗俞遜牘亟下贊書席寵過隆撫躬知懼伏念某起
家平素涉世艱勤本乏材能已絕進身之望粗安義
命敢萌過分之求初無左右之容忽奉清問之對服
在朝紳之末名豈登聞遠承帝席之前語將試用旦
暮獲千年之遇春秋閱一絕之周力雖竭而常憂任

重之不勝心雖勞而唯恐計短之不逮自虞瘵曠辜
此鑑知豈意超遷亟加柄用佐事樞則莫贊廟謨之
大參國論則何裨聖智之明驚歲首之頻更荷天心
之善貸因遂退休之請爰推進職之恩謂其身歷於
政塗特爾名加於規殿滿盈惕戒懇避矜從歸未定
而已促於藩宣秩未終而復移於留任君之待臣者
可謂至矣臣之報上者其將若何唯有懼心凜凜淵
冰之側但知勤事惓惓夙夜之間分所當然功而何

有兩郡未殫於駕力三年再被於龍光職司宮鑰之
嚴常親地禁名隸雲霄之表不遠天臨夢平生而未
嘗寵微躬而特厚施均內外眷備始終入輔出藩曾
莫酬於毫髮昔辭今受徒有愧於心顏伏遇 皇帝
陛下精鑒臣鄰博觀海宇謂分銅虎之寄均民社之
不輕而剖玉麟之符在事權而尤重矧曾參於近密
終令綴於邃清頒一札以示私使十連而增耀某敢
亦俯思職守仰體眷懷塵露甚微固何資於海岳桑

榆已晚終難報於乾坤
謝除資政殿大學士表
毛伯穎

護羣帥於遠方曾微善最冠諸儒於中禁載錫隆名
循墻雖切於固辭出綍難回於成命覲顏冒寵淪骨
銜恩中謝竊以秦隴驛騷岷梁疲弊宿師屯而扞寇
取民產以給軍非卒乘輯和則何以摧勅虜之鋒非
里閭安妥則何以供輿師之役而臣備負牧守授任
兵民謂時乃糗糧雖著魯侯之誓而為之保障孰先

尹鐸之寬徒自竭其股肱覲不傷其基本曾無見効
盍稱褒揚此蓋伏遇 皇帝陛下肅將天威勤恤民

隱削平區宇將大啓於帝圖懷保黎元每不忘於邦
本謂臣頗堅素守久侍清光粗供饋餉之期不失袴
襦之惠特推釀賞以勵微勞臣敢不自勉衰疲少圖
補報整軍經武豈惟德裕之雄邊和衆豐財遠稽諸
葛之善政少補中興之功業終諧歸老之田園

謝除資政殿大學士表
王介甫

祕殿升華名城優重寵靈溢分愧懼交懷中謝竊念
臣世系單平天姿滯固親逢大雅之會首玷秀廉之
科黽勉在公優游過紀被蒙眷與度越等夷省寺備
官禁庭充位分無可採懼抵冒於憲章寸有所長使
裨參於政治朴忠自信智慮罕通未盡將明之誠已
干苛譴之典至寬之度橫貸其誅褫夫左右之聯寄
以東南之屏敗財傷錦宜有衆多之譏增秩賜金本
非平素之望敢圖上聖復眷孤臣就徙通班改司善

部惟汶陽之奧壤乃魯服之大邦豈繫薄材稱是煩
使此蓋伏遇 尊號皇帝陛下遇臣之道於遠不忘
燭物之明雖微必迨追惟踦屨之舊特借叢雲之休
竊自揣循將安報稱臣敢不激昂志尚練悉政經宣
布詔條之寬綏安風俗之厚庶幾一得云補萬分

謝加觀文殿學士再任表

韓魏王

臣某言今月二十五日姪男太常寺太祝正彥賚到
官告敕牒各一道伏蒙聖慈授臣依前行尚書禮部

侍郎充觀文殿學士仍令再任及放朝謝者滿歲復
留已示寄邊之重議功無實何勝進職之優荷信任
則義不可辭拜光寵則愧無容地中謝伏念臣賦性
專樸遭時盛明過蒙仁聖之誤知惟恐忠義之不足
二垂所效一紀于茲挺然思報于國家倏爾已成于
衰病究疆場之事幾寢食之俱忘于進取之心固夢
寐之無及及矧此中山之會最居北狄之衝自分道
而新睿圖以非才而叨帥任當兵卒橫驕之後乘歲

時凶歎之餘得不出世之賢猶難訓治使甚愚者之
慮奚足哉安遽越代期分甘公黜豈謂伏蒙 皇帝
陛下天無不覆器之使人念考績之踰時貴守方之
有法深惟古制莫重久官將垂經遠之規寢草數遷
之敝特申褒典更責後勤任不辭難蓋推誠之所及
讓非中理雖冒賞以無嫌敢不益謹脩虞動存綏靖
俾吏民之愈信致師旅之增和生入玉關可謂前人
之隳志心居魏闕不忘踈迹之愛君苟未挂於吏文

終有裨於廟勝臣無任云云

謝觀文殿學士表

葉少蘊

恩非所稱難逃負乘之譏命出非常莫獲循墻之避
重勤訓飭倍克兢危臣某中謝竊惟學士建名雖與
前代近臣分職蓋始本朝至于易文明願門之稱冠
祕殿寵褒之盛仰觀故事尤號殊榮爰歷艱難蓋多
勲德以舊臣宣勞于外固不乏人由建炎越次而除
則無前比乃如同陋其敢叨逾茲蓋伏遇 皇帝陛

下義篤臣鄰憂深中外謂與之名者將求其實而使
之禮者必報其忠故于賢才蒐選之間每有上下并
包之意重念臣受材至薄涉世多艱少日量能尚有
滿盈之戒暮年多取豈無顛覆之憂雖願竭于餘生
恐終辜于大造

謝除端明殿學士兼侍讀表

蘇子瞻

衰年自引久抱此心異數併加實為非意辭不獲命

愧何以堪中謝竊惟以殿命官本緣麟趾之舊因時
修廢近正金華之名歷代所榮於今為甚自元豐之
末官制以來若非身兼數器之人未有名冠兩職之
重而况秩宗之任邦禮是司豈臣迂愚所當兼領茲
盖伏遇太皇太后陛下憂深社稷慮極安危求忠
臣於愚直之中論治道於文字之外知臣難進而易
退或非患失之鄙夫故授以禮樂清閑之司使專於
論說琢磨之事此恩難報願輸歲月之勤度已所宜

終遂江湖之請

謝除端明殿學士兼侍讀表

蘇子瞻

備負西學已愧空疎易職東班尤驚冒忝遂領宗卿
之事併為儒者之榮中謝始臣之學也以適用為本
而恥空言故其仕也以及民為心而慙尸祿乃者屢
請治郡兼乞守邊欲及殘年少施實效而有志莫遂
負愧何言今乃以文字為官常語言為職業下無所
見其能否上無所考其幽明循省初心有覲面目故

於拜恩之日少陳有益之言孔子曰一言可以興邦而孟子亦曰一正君而天下定昔漢文帝悅張釋之長者之言則以德化民輔成刑措之功而孝景帝入晁錯數術之語則以智馭物馴致七國之禍乃知為國安危之本祇在聽言得失之間恭惟 皇帝陛下即位以來學如不及問道八年寒暑不廢講讀之官談王而不談霸言義而不言利八年之間指陳文理何啻千萬雖所指不同然其要不出六事一曰慈二

曰儉三曰勤四曰慎五曰誠六曰明慈者謂好生惡殺不喜兵刑儉者謂約己省費不傷民財勤者謂躬親庶政不邇聲色慎者謂畏天法祖不輕人言誠者謂推心待下不用智數明者謂專信君子不雜小人此六者皆先王之陳迹老生之常談言无新奇人所易忽譬之飲膳則為穀米羊豕雖非異味而有益於人譬之藥石則為耆朮參苓雖無近效而有益於命若 陛下信受此言如御飲膳如服藥石則天人自

應福祿難量而臣等所學先王之道亦不為無補於世若陛下聽而不受受而不信信而不行如聞春禽之聲秋蟲之鳴過耳而已則臣等雖以三尺之喙日誦五車之書反不如醫卜執技之流薄書奔走之吏其為尸素死有餘誅伏願陛下覽臣言少幸聖意天下幸甚

謝加端明表

宋子京

乘塞無狀增秩蒙褒賜予侑頌心願交斲伏念臣才

弗振俗任偶逢時備內朝臣十有六載學不足膺天子之問文無以代王者之言遂圖外遷冀云少補惟定武一道直契丹右廷咸平以來號勁兵處自夏竦分建四帥韓琦始領九州節制中軍部分諸將琦既進律臣寔代居以一介懦儒當萬夫要任誼難辭劇奮靡顧愚然臣所習者藝文未曉者軍旅用非所習雖勤而弗效責于未曉故技有必窮用是再暮居無底績在法云殿惟黜是宜廼蒙皇帝陛下憫久成

之勞排彼譖之後雖遠猶錄謂拙可矜收雲閣之故
資著丹殿之新籍仍秩經省未易守藩叢沓徽章夸
嫖鄙邑重降嚴旨切卻讓封臣亦內揆愚心旁諭公
議若循禮疊請則恐涉不誠或固節還恩又似規早
罷不有粗使誰扞邊疆例格除音孰尊寵數輒昧涯
分祇服罷名日三省以自營身九殞而奚報但臣所
念者邊務至重敵詐益滋得人失人繫今日輕重知
已知彼為天下安危而有司特用苛法相挺守臣類

以生事為解封候畏怯不敢搖手倉庫虛乏正可寒
心建明累上而朝省未從姑息小虧則謗囂立至况
臣哀晏素自憊冥判無成功徒奈休命望審擇于豪
俊俾臨統于方隅設張遠謀羈制騎狄因罄敷于感
聽竊附列於瞽言朔壘地卑君門天阻被符蠲詞攬
綬知榮

謝兼端明殿學士表

祇膺寵渥伏積兢惶竊念臣性本方愚才非秀特早

遇洽平之治猥塵禁近之司繼承崇恩益升秘職荷
榮名之華疊愧庸品之孱虛此蓋伏遇 皇帝陛下
叙進羣才甄揚衆職遂俾至愚之質亦叨加惠之恩
惟當竭頑庶幾圖報

謝兼端明殿學士表

王禹玉

伏蒙聖恩授臣兼端明殿學士者外字皇藻既冒寵
于禁林入奉清光更加榮于秘殿恩非常擬望出意
涯伏念臣少起寒生夙陶盛化以孤童而就學承素

業之傳家遽踵峻英之游徧階華顯之序嚴扃預召
自驚一紀之遷從橐無空言點兩朝之遇加以介愚
少與讒訾積生南國分符惟望江湖之守西清仄席
詎勝朝夕之咨敢謂 皇帝陛下念學古之素勤記
受遺之前事特下十行之札申諭至明使兼三俎之
榮莫容固避雖曰濫賞豈不戴曲成之私猶殞身庶
幾盡一節之報

謝除端明殿學士知平江府表

自昔端明之職尤重選掄于今侍從之臣未嘗除授
乃緣外補獨被優恩伏念臣頃自遠方入登近列念
遭逢之匪異易宜報稱之何如三沐而薰竊收還于
神觀再拜以獻庶少效于愚誠而臣災禍洊罹疾病
交戰身其餘幾奚尺寸之能伸處不遑寧徒朝夕之
是懼仰蒙聖鑒俯燭愚衷分符俾在于輔藩進職仍
超于近列其為忝冒益以稠重茲蓋伏遇 皇帝陛

下擴大明以照臨百官推至仁以曲成萬物謂臣才
雖不遠固碌碌以無竒察臣志則靡他蓋惓惓之有
義全其出處加以寵光名隸禁庭蓋無分于内外心
存軒陛敢或替於須臾

謝除集賢表

韓魏王

臣某言伏奉制命云云尋再具表陳讓蒙降批荅不
允仍斷來章者右府本兵之重曷贊機微中台象極
之崇遽叨選任自顧非才之及此必非公議之所容

荐拜讓封訖無可報俯僂祇命覲羞在顏中謝臣聞
聖王不以獨化為高必置相而圖治賢臣不以極位
為樂貴行道以濟時上既勞于所求下亦艱于所遇
故求之得則仰成于庶務待以不疑遇之合則協力
于萬機果于自效固可以日興頽弊坐致太平生靈
蒙福于九圍君臣垂美于萬世恭惟皇帝陛下堯
仁舜孝湯智禹勤言動不諫而未嘗過為道德是富
而無一他好而猶念天下已治而恐啟于亂天下已

安而預防其危精擇輔臣以裨至化而臣學無根本
性多滯迂不知前世建治安之原徒愛古人立忠義
之節周旋俗務眇末常勞塵樞府以議邊尚詳梗槩
玷鼎司而論道何以開陳泰冒以來夙夕無措蓋以
陛下有置相圖治之聖而臣非行道濟時之賢何以
仰副天心俯慰人望然陛下既已求臣之誤亦當
待以不疑而臣所堅遇主之誠唯誓果於自效勉企
前哲動思至公庶幾民底小康時無大沴少寬待旦

之慮免累知臣之明填壑未聞期報如此臣無任云
 云以不歸而到前望聖主之慈即普恩於日於
 臣某言三月二十一日准進奏院遞到敕牒官誥各
 一道蒙恩授臣依前守尚書工部侍郎充集賢院學
 士依舊知桂州并准八月十一日中書劄子奉聖旨
 不許辭讓者封章上扣期遂于私誠宸旨下臨靡容
 于遜避中謝伏念臣命多奇隻器本疎頑起草掖垣

嘗因毀去懷章邸郡遽以喪歸向緣蠻落之內侵遂
 假獸符而外禦昔賢之赴公難有警則腰經以從權
 人子之報私恩已事則衣線而返次敢再援于古義
 願追服於素冠遽沐天慈過於擗散仍即藩垣之寄
 俾參英俊之遊重念元帥成功附驥已叨于膺士常
 僚失職拔茅未復于舊職乞還過量之恩少遂推賢
 之志豈悞聖謨廣大國典寬明俯鑒無他之賜不加
 非言之罪特申前命俾踐華途此蓋伏遇 皇帝陛

下堯舜聰明乾坤覆燾春生秋殺不私雨露之濡尺
短寸長必盡輸轉之用致茲蒙鄙屢玷寵光敢不祇
率郡條樂宣吏職農桑舊俗咸俾於懷生荒獷外區
悉期于稟朔莫稍禪于化體庶上答於皇慈臣無任
願並謝除右文殿修撰表
汪彥章
入對治朝方上甘泉之計進聯書殿遽先延閣之英
積此超踰若為報稱中謝伏念臣一將使指三歷歲
時徒殫犬馬之勤無補涓埃之數有功見知則說姑

幸使令投閑乃分之宜敢圖褒叙忽被雲天之澤擢
參奎壁之躔冒九等之崇資佩一時之新渥遷非以
次命出于中茲蓋伏遇
皇帝陛下道本曲成治惟
公聽謂勤於夙夜雖皆享上之忠非隨以賞刑孰謂
知人之哲比方歸報已辱甄收仍返故棲俾收來効
入預懷鈞之表著歸增乘傳之光輝臣敢不祇服訓
詞茂宣德意益加緣飾不專俗吏之所為永誓糜捐
庶幾古人之大節

謝除龍圖閣學士表

蘇子瞻

中禁寶儲上應奎壁之象先朝謨訓遠同河洛之符
隸職其間省躬非據中謝伏念臣學非有得愚至不
移雖叨過賓之名卒無適用之器少時妄意蓋嘗有
志於事功晚歲積憂但欲歸安於田畝屬聖神之履
運荷識拔之非常猶冀桑榆之收遽迫犬馬之疾力
求閑散庶免顛濟豈謂皇帝陛下聖度包荒天慈
委照察其才有所短不欲強置之禁嚴知其進不由

人故特保全其終始遂加此職以責其行臣敢不仰
緣末光益勵素守往何之而不可中無愧之為安但
未死亡必期報塞

謝除龍圖閣學士表
韓元咎

冒三銓之長久玷近班首六閣之聯遽叨美職恩踰
意表愧溢顏間臣某誠惶誠恐頓首頓首竊以入從
出藩本侍臣之常禮循名責實斯主止之至權速夫
寵數之驟加必有勞能之可紀仰河圖于東序是惟

冠百世之彌文通禁橐于西清必以待一時之舊老
如臣者少而孤陋晚益顯冥符節屢頌久載馳于周
道珎環遞賜悵幾入于修門未酌神聖之知竊有滿
盈之懼茲由常伯自詭便藩綸命高華豈謂疏榮之
特異奎躔炳耀殊非避寵之能安此蓋恭遇 皇帝
陛下湯聖日躋堯仁天覆察臣持循法令粗知課力
之方俾臣宣布詔條曲示臨民之渥顧此鸞鳩之質
曷窺龍馬之光臣敢不被飭懦衷荅揚隆施官雖外

服尚司寶禁之儲名在諸儒敢忘論思之報

謝除龍圖閣直學士表

宋子京

臣某言今月四日閣門拜受官告教牒各一道除臣
龍圖閣直學士知杭州者層禁叨榮大邦蒙委恩叢
非願愧溢乃情恭以聖考上文寶楹胥構大開天策
之蘊分置金匱之藏間召名儒入當清問因璇題之
華構冠學士之美銜矧為峻資固非崇東如臣者器
資擣昧學術迂孱幸有親逢記無報稱四年待詔姑

奉疑嚴之游兩罷佩符不絀循良之目賜還適著俾
演大言扞格哀齡疋綿宿疚胡廣不行之舊動輒有
忘左史能讀之書舉皆未學茲焉弗識况也自知道
會要藩慎求缺守宰司誤啓制詔聞俞既籍內于神
深又節假其蕃翰誼非輕外治寔責成目見河圖遂
過宣尼之願名留禁闈更無汲黯之嗟斯蓋 皇帝
陛下續短于長勸能以否謂雖一介自有鳴吠之專
借曰萬分亦收涓埃之補庸加拉拭垂逮未愚敢忘

夙夜之恩以忝身修之永神而可質心不難銘

謝除龍圖閣直學士表

汪彥章

鋒車趣召記甘泉法從之餘芝檢疏榮陞延閣清班
之首恩光曲被感涕交流中謝伏念臣頃以疾辭安
於外補剖符方面兩膺南國之除持橐禁嚴四玷西
清之選自守枌榆之壤屢驚蒲柳之秋身留閩徼之
山川夢寄長安之鐘鼓所憂餘日莫陪鳴玉之班何
意中天忽降賜環之命奔馳上道展轉逾時曾未對

於清間已亟蒙於褒叙錫之華秩寵以神毫豈伊蹕
蹕之微蹤堪此蕃宣之異數茲蓋伏遇 皇帝陛下
天臨萬物子視羣臣憐孤生去國之七年抱衰疾守
蕃於萬里靡因人譽召李布於河東因受帝釐見賈
生於宣室特假河圖之峻用為州之榮豈惟示眷於
始終蓋欲均勞於中外臣敢不益堅晚節無愧初心
雖宿疾未除難以筋骸之勉強然大恩必報誓於肝
膽之糜捐

授龍圖閣謝恩表

宋子京

臣某言伏奉制命蒙恩特授臣龍圖閣學士者停直
複門徒恩層閣本緣親而自乞蒙引藉以對除揆寵
兼常無顏容愧竊惟先聖有作叢構寔興舊律辰居
之嚴裝積霧圖之廣踵華創職稱是取材肇允榮塗
何嘗輕授伏念臣識局庸淺術學膚孱入忝玉堂間
陪講殿徒以樸忠無飾孤耿自將附湜湜于涇清守
嚶嚶于雨晦賴天燾煦曠日保全適以臣冗序召自

外藩復參大政理宜避地不處嫵稽首請聞素言叙
懇丐上還于禁籍得專侍于經帷伏蒙皇帝陛下
見謂由哀特從換秩罷茲要近處以清閒拂佞擬之
塵容廢壇蛸之寶宇伏况臣出入三歲便藩五遷四
叨學士之名罕見從官之比雖素領焦禿病軀疴癯
器極斗筲之容利止鉛刀之割尚當勉懦為立績短
俾長倘有補于涓銖矢不忘于隕路

謝龍圖表

宋子京

右臣伏奉今月七日中書劄子以臣陳讓龍圖閣學
士奉聖旨令臣依累降聖旨不許讓辭便令受告敕
者危慄數陳嚴音三卻拒命難固蒙寵增慙伏念臣
天俾蠢愚性止崖介寺借其運寔不副名然十七年
中徧踐美職為龍圖閣直學士者一翰林端明殿者
各再龍圖閣侍讀者三今又叢資累華併為異數當
今兩制無職皆不逮臣材劣衆賢而恩冠近列是以
亟剖丹若上格詔文渙汗弗收匹夫終奪昔三綬為

後兩印自矜未若臣秘禁經筵寶圖重構銜置複班
級高華此蓋皇帝陛下垂憐哀殘早經驅策因避
嫌之請增通籍之榮鉅鉸廐駒稱服珍帶山岳施重
螻螻命輕論報何階撫躬如隕
謝除敷文閣直學士表
洪景伯

宣布中和方歌盛德之事擢列侍從遽復敷文之階
德雖自於合宮恩實顯於黼座幸逾望表懼溢情涯
臣中謝伏念臣一汙周行三陪近著莫之致而致者

盡出聖明非所據而據焉卒孤簡注老之既至時不
重來正浮食以太優更叨名而特異過能自訟孰云
白璧之無瑕寵至若驚不失青氈之舊物身在江湖
之上班聯殿閣之中人以為榮臣獨知愧茲蓋伏遇
皇帝陛下照臨若日溥博如天賞以馭成渙治功之
綜核祭則受福章宗祀之光輝曾是寒蹤曲蒙私覆
臣敢不深惟玷缺益務激昂臭腐復化神奇念隆知
之未報貧賤常思富貴顧再命以難勝

謝除敷文閣直學士四川安撫制置使表

汪聖錫

連率之權非其他比職名之寵不以次遷內省無堪
力辭弗獲伏念臣來自下土列于近班斗筭之人豈
足言于遠略老馬之智猶可效于外官心雖甚勞課
僅自效敢謂聖明之過聽復茲委寄之有加以不知
兵而盡護于將屯以未閱歲而再升于華序愧懼交
戰啟處靡皇此蓋伏遇 皇帝陛下居九重之遠而

垂念于遠方攬多士之富而曲收于片善察其謹畏
謂可使令特捐寵光明示恩意可當一面顧曷稱于
褒揚如履薄冰惟不忘其儆戒

謝太上表

汪聖錫

帥權特重名寵過優自顧么微豈能負荷伏念臣山
林冷族章句鱣生親蒙賜第之榮遂出在庭之右寢
叨簡拔馴致超逾茲者獲奉藩條僅逃官謗敢謂褒
嘉之渥更當委寄之隆人微望輕力小任重殊未知

于稱塞徒有愧于生成此蓋伏遇 光堯壽聖太上
皇帝陛下道妙難名功高不宰凡曰飛潛之類率皆
長養之餘獨此孤生尤非衆比身非敢愛奚辭蜀道
之難豈謂遐自託堯天之大

謝除敷文閣直學士表

王龜齡

任南國守臣之寄治効茂聞綴西清學士之班聖恩
誤及宰辭弗獲下拜有慙竊念臣學術空疎性資愚
蠢蚤躬耕養妄懷干祿之心晚竊科名誓竭事君之

節許身自比於稷契得時况過於唐虞上皇親擢之
於布韋陛下又置之於臺省徒屢膺於任使竟莫報
於涓埃去國八年分符四郡覺年齡之云暮致疾病
之交攻藥百試而莫痊祠三乞而不許心勞政拙僅
同下考之陽城金賜秩增有愧能名之黃霸揣分宜
黜蒙恩若驚茲蓋伏遇 皇帝陛下仁覆邇遐賞從
忠厚與人不求其備嘉善而矜不能謂臣雖不達於
時宜知臣或稍諳於民事寵畀候藩之重起陞庭閣

之榮臣敢不仰務分憂俯當盡瘁拾遺補過雖良臣
之願莫酬宣化承流庶循吏之風可繼

謝除龍圖閣直學士知湖州表

汪彥章

論恩亡補席寵過優蒙內史之贊書預西清之更直
載循僥冒深積兢危中謝竊惟祖宗謨訓之藏上憲
奎壁圖書之象敬禁楹而並峙命儒學以遞居矧接
鴛鴻之游尤高龍馬之選法從假之而出守書生得

此以為榮夫豈孱庸所能堪副此蓋伏遇 皇帝陛下
下聰明稽古寅畏奉天見賢而拔其尤每兼收於羣
策撥亂而反之正將光復于丕圖而臣久服周行最
為冗從入備內朝之供奉出分輔郡之願憂雖遠清
光實繫全度重高明之地張已負於明恩踐文石之
班敢遽忘於雅意

謝除顯謨閣學士表

汪彥章

蒐求載籍僅輸掌故之勞越進通班益玷承明之選

蒙隆施之游及懼小己之難勝中謝伏念臣少則嗜
書老而憂國念廣記備言之所載雖諸侯小國以猶
傳豈承萬世之丕基乃缺一朝之信史固露章而有
請蒙給札以兼收周旋雖閱於七朞綴緝敢忘於一
日多識漢事徒竊慕於蔡邕續承晉書願誰推於陳
壽豈意奏篇之瀆遽叨增秩之榮此蓋伏遇 皇帝
陛下繼體守文奉先思孝既皇皇追慕望鼎湖弓劍
之還宜汲汲纂修求石室圖書之備明詔周詢於海

內遺編悉上於史官方博見聞一新凡例而臣夙蒙
驅委適就編摩固難追補於螭頭幸已獲臻於麟趾
爰冒塵於乙俄超擢於西清仍許乃僚亦同茲賞臣
敢不誓殫撲學仰稱明恩問周穆王之詩庶无慙於
子草上段太尉之事當更採於宗元

謝顯謨閣直學士知婺州表 樓大防
典選無聞方上便親之請承流已試載叨出守之行
寵躋延閣之班墳賁輔藩之寄祇膺明命倍激危衷

中謝伏念臣奮迹孤單逢時休盛昨自東嘉之收召
尋登左省以推遷代言慙潤色之工封詔之塗歸之
效及夫紬書視草勸講掄材皆儒者之至榮豈生平
之敢望饗誤恩而踰分致私室之延災重貽慈母之
憂益動故鄉之念力祈閒退仰賴矜從侯邦分寶婺
之區學士寓文謨之直絲常伯而出于故事或有此
除攷公論之歸在小臣恐非所稱莫遂循墻之避徒
深戀闕之誠茲茲蓋伏遇 皇帝陛下覆育羣生敷

求長吏察臣昔當一郡拊摩粗竭于微勞念臣今歷
三朝進退欲全夫素守俾司乃牧俯使其私臣敢不
欽服訓詞益思礪礪五百里曰甸不違咫尺之威二
千石惟良少展涓埃之報

聖宗名賢五百家播芳大全文粹第十九卷終

聖宗名賢五百家播芳大全文粹卷二十

謝表

謝除使相判相州表

韓魏王

臣某言近奉制命特授臣淮南節度使守司徒檢校
太師兼侍中判相州加功臣食邑食實封尋西具表
辭免蒙降批荅不允仍斷來章者宰職隳功莫副宵
衣之治鄉邦得請重叨畫錦之行被恩典之特優顧
人言之甚愧臣某中謝伏念臣早繇科第遂玷寵榮

不圖翰墨之進身自竭涓塵而報國備員諫諍幾不
免于竄投奮命疆垂寔荐罹于艱阻獨特聖神之眷
誰開援助之言仁宗皇帝知其守以孤忠謂可屬
之大事慶曆之始已擢貳于樞機嘉祐之中乃進登
于宰輔俄膺冢任益荷殊知當英廟之承祧逮聖人
之嗣歷禍重遭會罄竭愚庸惟知社稷之安豈顧家
宗之未然而萬微多務一紀妨賢為國持平敢自私
于輕重裁人所欲固難免于愛憎加疾疹之嬰纏苦

形神之耗敝免訖因山之禮懇陳上印之宜伏蒙

皇帝陛下念犬馬之力易哀擴日月之明為照不罪
再三之請亟垂開可之音進秩地官剖符扮社建高
牙之重既疏淮海之封增故里之光仍襲貂蟬之舊
叨塵實甚今古疇偕敢不思盡瘁於寢興泯寘懷於
內外在邊在庭之責惟驅策以當前益堅益壯之心
至縻捐而後已臣無任云云

謝除徽猷閣待制表

蘇叔黨

起於琳館付以名邦復玷除書薦膺謀帥寵以禁嚴
之職俾增方面之崇誤恩曲加撫躬知愧中謝伏以
陳力就列臣子所以委質而事君為官擇人朝廷蓋
將厲世而磨鈍自昔祖宗之故事必由侍從而進人
况內閣之華資待天下之名士掌星躔之寶訓近日
月之清光豈特搢紳之榮實高儒學之選而臣賦材
鄙野備問空虛福盈每懼於災生器小不堪於大用
弟兄持橐愧先後于一門銅竹請符蓋屢窮於五技

獨荷淵衷之眷辱收閑廢之餘雨露所加乾坤莫報
此蓋伏遇 皇帝陛下聖神廣運睿智有臨法天地
之自然一道德而同俗長轡遠馭操爵祿以興事功
左戚右賢惜名器而彰淑慝察臣之先容於左右知
臣嘗盡瘁於使令致此恩榮下及孱陋臣敢不策其
駑蹇但永堅於一心志在糜捐庶用酬於千載

蘇州謝就除禮部員外郎充天章閣待制表

范文正

臣某言伏蒙聖恩特授臣前件官充職者渙渥自天
震惶無地改中臺之華序進內閣之清班盡出高明
殊登秘近臣中謝竊念臣發自顏巷賓于舜門一第
為榮四方無效爰自書林預選閨籍升華恥汨沒以
懷安或感激而論事惟慕古人之節詎希英主之知
伏惟皇帝陛下稟帝堯之聰明加漢高之豁達坦
聖懷而虛受期鴻化以咸孚念三聖之艱難而成丕
業求七人之蹇諤以補大猷臣獨愧非才首當清問

危言多犯孤立自持斧鉞居前雷霆在上敢避樞機
之禍終垂藥石之良 陛下日月垂光江海敦量恕

其萬死假之一麾望已絕于青雲江海久于鴻濛俄
易藩宣之寄寧分旰昃之憂忽降綸章荐加寵數而
况闡圖書之府切處于深巖踐雲龍之庭當備于顧
問非名儒而不稱豈曲士之能堪矧造清曹仍居舊
治輝榮大集志願何求敢不內守朴忠外修景行進
退惟道遵聖賢視履之方始終一心副君父育材之

造臣無任云云

謝除敷文閣待制表

官自外遷既濫中權之寄恩由上出復叨友對之除
抗草弗俞拜命增惕竊念臣才惟樗櫟業本蓬鹽偶
逢神聖之作興妄意風雲之際會立螭簪筆方近清
光冠豸乘驄遽違丹闕俯悵忠懷之莫盡仰知天眷
之未衰繇列郡而擢居帥垣自集英而起躋華閣易
任誤蒙於增秩撫躬深愧於罔功清議靡容牢辭不

獲茲益伏遇

皇帝陛下至仁接下大度包容謂臣

如汲長孺之愚言多妄發知臣有蘇世長之短心不
敢邪榮畀重藩許連從橐臣敢不益堅素守誓竭孤
忠共理分符何以副西清之選拾遺補過可能無比
闕之書

謝除待制表

韓无咎

分符出守已叨便近之藩錫命寵行尚綴禁嚴之列
懇辭莫遂跪受彌兢伏念臣久以庸愚誤蒙簡拔周

遊省戶參掾屬者九年密勿從班備銓衡于兩選積
有邱山之厚戾了無塵霧之微勞外并名州實踰分
願中聯美職滋冒恩榮恍然未定之驚魂甚矣橫流
之感涕茲益恭遇 皇帝陛下仁如天大德與日升
器使羣材管蒯盡歸于採掇生成庶彙蟲魚咸遂于
飛潛曲示眷私用光臨遣臣跡雖違于丹陛名猶濫
于清廟惟近臣獻納之私未殫于補報若刺史中和
之布敢負于使令

謝除秘閣修撰表

張敬夫

臣某言先在廣西任日伏蒙 聖恩除臣秘閣修撰
尋具辭免奉聖旨不允已祇受告命者奉藩何補坐
閱三年進律之衰乃蒙再命控忱辭而莫獲拊小已
以增羞中謝伏念臣鈍質無堪孤蹤難植俾保障於
遠服凜危懼之百懷惟仰侍於聖明勉自殫其心力
班超之策但守於平平陽城之書固甘于下下豈期
膺獎薦賜寵光俯矜塵全之餘生俾隸蓬萊之高選

超踰若此報稱謂何此蓋伏遇 皇帝陛下器使羣
才光被四表願未忘於簪履之舊尚念黜愚將示勸
於牧圉之臣姑從隗始榮踰華袞愧甚循墻臣敢不
勉務朴忠仰承德意始終一節期不負於素懷驅馳
四方敢或殫於煩使臣無任

謝除祕閣修撰表

葉正則

諗疾丐歸將待休于一壑疏思寓職乃增重于三湘
衆之所榮臣以為泰 中謝 窃以典修中祕肇自政和

必須資歷之多號稱館閣之舊屬厭時望積累外庸
不虛論撰之名始副掄除之實伏思臣者素謂畸人

雖早汙于清班亦濫塵于煩使施已深而未報福遽
過以挺災坐閱寒涼再徂歲閏及此扶行而問俗幾
成尸素以具官惘惘于簿書之程區區乎醫藥之事
空抱膏肓之苦莫克砥磨迄何毫髮之勞可當褒序
飾朽株以丹青之美登醜石于珪瓚之叢凜然無堪
躡是異數此蓋伏遇 皇帝陛下至公衡聽兼受曲

成憐其拙踈若在所取不緣孤外而有遐遺使之託
身文字之林掛名奎壁之次煥矣賁賚燁其寵章臣
末路幸逢矢心銘激悵沉痾之縈薄未測頽齡恐綿
力之支離弗耐大造

謝除直秘閣表

晁之道

聖心念切曲軫累朝之故老德澤延世亟參內閣之
華資遺烈載明危心增懼中謝伏念臣賦才甚下涉
學未優備聞忠孝之風粗識君親之義每竭臣節以

明父勲甘九死而不辭幸一言之能感蓋以先臣之
遭遇積勤勞於皇家共惟列祖之眷懷實度越于群
辟昔事仁祖再登宰衡既成河朔康濟之功復啓至
和援立之策左右英廟翼戴裕陵蓄德弗言遭時乃
顯於赫元豐之詔大明嘉祐之勲位冠公卿名先彞
鼎賡歌未遠奎畫具存肆蒙上聖之哀憐盡滌曩時
之過咎追還恩渥備載策書薦愍哀宗最為零替俯
矜愚息特俾褒陞矧圖籍之所藏實英俊之攸處豈

容陋品亦玷優除此蓋伏遇 皇帝陛下睿智日昭
聖謨天運制作之効不日有成太平之功視古無愧
謂方今之多士悉已招延惟在昔之宗臣豈忘褒顯
罔間存沒均被寵靈臣敢不勉激懦衷力遵先訓懷
顯親之義已獲發其幽光輸報上之忠惟有殫於死
節

謝除直秘閣兼賞賜表

呂伯恭

右臣今月四日承中使李裕文宣諭聖旨所編文海

精當賜銷絹三百疋兩者奏篇無取錫命有加既叨
中秘清切之隆復拜內府便蕃之賜人微恩厚感極
涕零此蓋伏遇 皇帝陛下聖學高明皇猷淵懿粲
然衆作思採撫以無遺蕞爾小臣懼討論之不稱已
逃罪戾仍被眷私抱慙懷鈔曷副右文之意賜金增
秩徒慙稽古之榮

謝除待制表

王龜齡

臣某言某年某月某日進奏院遞到誥一道伏蒙

聖恩特授朝奉大夫充龍圖待制依舊知池州臣已
於當日祇受謝恩訖識慮蠢愚固甘遠斥恩慈博厚
猶假小麾第深循省之思豈有甄收之望明綸下逮
感涕交流中謝伏念臣幼粗知書晚方入仕嗣雖為
表之業頗慙畫餅之名挾槩磨鉛時枕藉於圖史含
香珥筆每步趨於省臺誤被簡知薦加馳策僅同駕
馬之十駕坐致力殫未効飢鷹之一呼居然氣索扶
衰上道弔影自憐竭來江湖之濱亦當民社之寄目

昏貿貿詎堪從事於簿書臂病拘拘行願乞身於田
里遽頒宸翰俾復從官在聖度之兼容何孤忠之可
覲茲蓋伏遇 皇帝陛下堯仁舜孝禹儉湯寬紹述
法度而咸適厥中任用人材而各安其職憫茲孱陋
示弗弃遺延閣通班幸列西清之嚴近左符有守敢
嗟南服之滯留終誓縻捐仰酬覆育

謝除男正言待制表

王介甫

孚號明恩實由中出美官要職弗以次加知榮耀之

及私顧僭差而累國雲天在望冰炭永懷 中謝 臣出
於窮窮好是拙直道常違俗宜芻狗之致妖才不逮
人何蠶蠋之能化 皇帝陛下收之末路付以繁機
距滔天之衆讒責經世之來效施及賤息度越調人
延登朝行使嗣講業方仰陪於膝席俄中廢於胥瘍
雖進趨之禮久妨而問勞之恩狎至莫知報稱但負
兢慙豈意眷憐更加超擢待制之為職以陪侍禁嚴
正言之為官以諫救遺失承金華之舊學親玉色於

燕朝併叨殊私甚駭羣聽此蓋伏遇 皇帝陛下攬
取同智無小大之遺搜揚衆材無久近之間苟或不
肖槩嘗有聞必垂甄收示以勸獎四方之訓于我無
競維人多士之生斯時不顯亦世永惟遭值孰與等
夷君臣以事道相求是惟父子以傳經見用鮮或同
時雖愧臯陶濟美之材敢忘孤突教忠之義

謝換朝散大夫直集賢院表 范堯夫

臣某言閏九月二十五日進奏院遞到教告各一道

特授臣朝散大夫直集賢院仍加上護軍差遣賜如
故者承流居外荷謫命之寬優渙汗從中拜恩榮之
併至省躬無地蒙施若天中謝伏念臣學不知方慙
唯拙守濫竊祿任自託公朝先帝采其家聲擢居言
路陛下博於器使驟玷清班每投効以下遽輒掄瑕
而收用向冒邊防之寄猥分節制之嚴奉陛下之訓
辭識先臣之遺教謂綏靜而復紛紜既速煩言且無
善狀至于吏議甘擯棄于明時猷類君恩獲安全於

散地豈期簡記靡俟終更因宗祀之慶成易官名而
還職朝家新制遽叨等級之榮書館舊遊再竄光華
之選仍加勛號盡出洪私式示優遷非徒起廢此蓋
伏遇 皇帝陛下體天洪覆東道建中恢全德以博
臨憲先猷而致治謂臣闕閱之後雖屢試以無成憫
臣齒髮雖衰俾自新而圖效致茲寵獎下及孤孱臣
敢不仰體深仁俯追往咎居官弗懈庶無門戶之羞
論報何階猶有簿書之責臣無任

謝加朝散大夫表

王禹偁

臣某言今月十八日進院奏通到勅除一道伏蒙聖
慈加臣朝散大夫者禮成大祀澤霈百僚豈期郎吏
之卑亦從大夫之後臣某中謝伏念臣猥因薄技獲
遇昌辰自忝文科累叨華貫數年綸閣徒勤潤色之
功百日玉堂詎有論思之効而自離近侍官責帶詞
既別白以無門但憂危而度日比者伏遇 尊號皇
帝陛下圜邱展禮率土推恩特加五品之資俾壯一

麾之任况臣早叨書命備見舊章每當行慶之時必
考授官之限未滿二載例增五階率以為常行之自
久臣去年五月出職今年二月加恩承奉即陞級未
崇朝散階遷陞不次必由上由睿聖旁出僉諧以某
曾近作臣不欲便同常例永言感遇空極涕洟遂使
死灰之心稍生于寒燄戴盆之首亦見于天光誓捐
微軀以荅鴻造無任

謝加朝請大夫表

王禹偁

臣某言今月十三日進奏院通到勅牒一道中書劄
子一封伏蒙聖慈以臣預修太祖實錄授特旨朝請
大夫仍賜絹五十疋銀五十兩者陞級清崇錫賚優
厚恩生望外事繫宸衷仰戴寵光伏增戰越臣中謝
伏念臣素無望實久玷清華訓誥典謨罔知體要春
秋禱祀豈識指歸去歲伏遇尊號皇帝陛下詳觀
圖書追念始祖顧復不祧之廟光揚納麓之勲以為
自昔編脩或多漏畧永懷丕烈深軫孝思謂漢祖元

功立紀于武帝之世神堯寔錄重定于高宗之朝爰
詔近臣再編茂寔臣叨膺是選尤媿非才尚賴宰臣
李沆監修錢若水總領其職臣則討論遺事潤色舊
文始則合秦趙世家得國姓之根本考唐杜氏族見
太后之源流凡所改更皆有按據庶彰帝業以副天
心方弛汗簡之勞遽有分符之命無由別白但積憂
危加以年髮漸高郡封甚僻野鳥閑暇潛窺賈誼之
容江魚噉喙欲嗜靈均之骨未知何日再覩天光豈

致涉方而不還既海隅皆服于堯喪宜柱下一新于
漢注夙蒙垂付適幸纂成豈謂 皇帝陛下明發有
懷兼收罔棄嗟夏時之既失于杞莫稽幸商頌之復
全以那為首特懋存書之賞猥霑承學之臣敢不仰
奉殊私俯殫絲力哀中朝副墨之要俟良史殺青之
求穆王御駿以來歸已孤此望孔子感麟而有作尚
見其人

謝除左中大夫表

葉少蘊

賞必貶功既誤褒嘉之實老宜戒得重貽貪冒之譏
退自省循惟深墮越臣某 中謝伏念臣久從幽屏再
荷使令戎事猶艱固欲竭情而自效聖恩未報敢期
愛已以偷安雖抱此心訖無成績故力求于閒散幸
苟免于曠瘵方俟矜從反叨寵教鉛刀何有全牛之
技已窮故道空存老馬之知餘幾茲益伏遇 皇帝
陛下高明委照博大兼容 光宗 勵有功豈受彤弓之
錫憫憐舊物未忘墜履之收致此迂愚例存記錄臣

敢不勉承德意更激懦衷洛邑初營曷稱保釐之守
漢儀復見終然戡定之期

謝除中大夫表
樓大防

由選部以守藩方陳祠請回年勞而進秩更沐綸言
祇拜以還感銘何極中謝伏念臣生逢聖主世受國
恩雖歷仕累朝幸相繼百年之外而傳家三葉俱弗
踰六品之階敢期後嗣之微乃越先臣之舊共承遺
訓未知聞詩聞禮之言追仰前踵徒有慙長慙卿之

誥豈特一門之幸實為千載之逢茲蓋伏遇 皇帝

陛下優待臣工仍嚴銓法三年攷績既容賞典之參

一體疏榮爰示禁途之寵臣敢不激昂素守銜戴隆

知漢議方興媿乏倪寬之對淮揚既遠敢忘汲黯之

患

謝除大中大夫表
樓大防

一身去國方叨祠廩以娛家四品頒綸乃次年勞而

增秩素餐已甚丹悃知歸中謝伏念臣少也教竒晚

而多幸備皂衣之吏三朝許廁于周行聯紫橐之華
四載得陪于從列踰涯自愧補外以行荷聖君從欲
之仁賦真館祝釐之粟班通禁路尚汙文謨內閣之
嚴法應吏銓遂躡秦官大夫之首寄祿寔高于世胄
被恩得奉于親歡視賈誼之超遷固非敢望比申公
之即拜豈不懷慙茲蓋伏遇 皇帝陛下器使羣工
曲成萬物念論思之舊侍未忍遐遺付品式于有司
許容平進周章登受俯偃何言臣敢不祇服訓辭欽
承命數老疾而無職事寔深稱于閒居優游不易公
卿特未知于報所

謝除右補闕表

田表聖

臣錫言臣今月二十日于天雄軍得河北南路轉運
副使李瑄差軍將賈送進奏院遞到官告一通勅牒
一道伏蒙聖慈授臣右補闕餘如故者綸言進秩諫
省增榮祇荷寵章徬徨交積中謝伏念臣叨居侍從
有玷清華薄才悞受于聖知非次驟分于憂寄積粟

備邊之策豈是所能豐財利國之謀又非素習伏遇
禮行清廟功告園邱慶澤惟新雖下周于庶品優思
特異俄叙轉于華資臣每讀唐書載觀名士裴度蘊
三公之業歷此清途吳兢有良史之才當茲哀職臣
識非淹邃辭媿菁英直館踰年未舉編修之職乘軺
將命俄兼飛輓之司微効弗伸榮遷驟至太平無事
忠言寧補于皇猷封禪有期覲禮但思于丹闕臣伏
限所守不獲奔詣宸階無任瞻天戀聖感恩激切歡

呼屏營之至

謝除吏部郎中表

宋子京

臣某言伏奉制命特授臣尚書吏部郎中依前充職
者課容歲比官得例遷華秩誤躋愧襟周措伏念臣
本緣羈遠誤直禁嚴病與生俱哀先年至間抱風波
之悸實依山藪之藏牽勉拙艱婆娑歲月攸歲未驗
不職應誅敢圖公府之署年直徇臺之進秩報聞既
允付外遂行拜獎絀以驚魂躡華塗而拊股此蓋

皇帝陛下天無擇覆春不檢和謂陟明之格普頒且
宿業之勤必錄遂容孤蹟亦被優除謹當潔雪而煩
彰施厥采和羊腸而叱度觸難雨以長鳴苟味是言
有如茲日
謝特授工部員外郎表
田表聖

臣錫言臣今月二十六日蒙恩特授工部員外郎為
無例于崇政殿告謝尋于二十七日謝恩訖臣伏觀
臺司引見左降官凡百餘人唯臣獨授官資復齒班

列循省榮懼不知所裁中謝伏以受恩特深叙感亦
切苟不披露肝鬲敷陳始終則何以表聖人特達之

恩何以見微臣遭逢之幸伏念臣稟受之性愚直自
知遐遠之人孤危自奮遇陛下肇登寶位親主文衡
臣詞藝非長器能無取軒墀之下賜以策名科第之
中復在殊級揚歷官序便居侍從之班臨蒞公途常
守廉勤之節此外不忘筆硯載成詠歌始因進升平
詞擢為諫官後因上封禪書令知制誥遷授非次報

五百家類書卷之六十五
答無由是以有所見聞輒形章疏靡詳事理屢貢芻
蕘臣子之心唯思謹切君親之意不罪狂愚 陛下
所以賜臣獎諭勅書欲廣上言之路 陛下因臣特
降御劄旁求敢諫之人德至明而無不照道至大而
無不包納臣又嘗因聖節輒貢蕪詞蒙 陛下怡天
睠而優容降宸章以宣和臣又嘗因時雪輒進歌行
珠旒亦賜于披觀金口曾垂于嗟賞臣至愚至陋無
藝無能有如此微榮有如此遭遇殺殺身無補于萬

一而過分寧免于顛濟洎閣下改官淮陽典郡素無
政術但守詔條然京輔之間豪猾難理州郡之職智
慮不周負 陛下拔擢之孤恩 陛下憂苦之旨致
有公過上煩聖聰每思受恩既異於常倫受責亦宜
於加等 陛下尚寬朝典俾副戎車不踰年逢赦量
移未周歲抽歸引見臣得生還帝里獲面天顏慶幸
已多私願已適豈期召聖復真周行自衆多罪人之
中授清華外郎之秩拜官之後受命以來夙夜省循

俯仰慙懼感君恩之特異倍激私誠慮公道之或虧
寔憂官諉將何名節用贖疎遺敢不遵臨深履薄之
言守補過盡忠之訓冀伸微効上答鴻施

謝史成受朝奉郎表

曾文昭

裁成二帝之書仰資聖訓褒錄諸儒之效俯逮群生
繆進官榮併叨恩賚省循非稱冒昧為慚竊以簡冊
之傳固多帝王之書為重文章之用非一述作之體
為難在昔有官若時稽古自周而上具載百篇之言

繇漢以還各成一代之史典謨之辭略而推春秋之
法謹而嚴子長雖謬于是非見稱是核孟堅頗推於
詳贍或患文繁降及後人益艱是任或紀事支離而
失寔或設辭舛駁而不工或踈略牴牾之相形或取
舍抑揚之未當歷觀前載茲謂材難矧兩朝功德之
崇高而五世聲名之富有以致俊傑瑰竒之士擣杙
蒐瑣之姦載在信書傳之後裔宜得貫穿馳騁之學
溫潤深純之辭追二典之光華垂百王之軌範如臣

之鄙揣分無堪幼聞道於父兄粗知好古長論文於
師友竊慕著書然而植性昏冥受材濩落有淺見寡
聞之類無屬辭比事之長遭世盛明脫身冗散天祿
石渠之奧蚤預校讐金匱玉板之文得參論次茲儒
林之盛選寔仕路之殊榮特達甄拔莫非帝力周旋
長育咸出上恩自視庸虛固難報稱雖勤劬於夙夜
漫淹歷于歲時闡發大猷豈敢希于作者整齊故事
或可繼于前人甫臨汗簡之終適遘負薪之疾奏書

天陞阻親望于清光拜賜宸庭莫與聞於褒詔豈期
推賞并及罔功養拙藏愚久已逃于常憲因人成事
茲復玷於異恩遜避弗容驚惶失措此蓋伏遇 皇
帝陛下務尊先烈祇紹永圖謂祖考之功非形容之
可既而子孫之孝在潤色之為能深詔有司共成大
典蓋兼資於衆智不求備於一人每矜載筆之勤靡
間歎等之濫致茲瑣質均被鴻私螻蟻雖微素積愛
君之志涓塵有補敢忘許國之忠

謝進職因任表

張敬夫

內閣分華進其寓直介藩因任錫以贊書既莫遂於
終辭凜不知夫所措臣某中謝伏念臣昨承人之來
守領隅忽坐閱於兩秋亦既殫於五技所賴旁流之
惠澤故茲少息於疲疪吏於其間譴因以免敢希誤
寵何有微勞此蓋伏遇 皇帝陛下以大有為之資
行不忍人之政遠邇一視真傳太上之心賞罰至公
悉聽輿人之論惟臣不敏冒稱所蒙况聞前哲之言
多畏居官之久非人情狃習之為慮寔已志怠忽之
難防其幾弛於方寸之間則害及於一路之廣反覆
以念經營莫寧敢不履薄臨深益思謹於侯度庶幾
積銖累寸或不玷於皇明

詩經

物類

終辭

身錄

舞桂

論語

雜所

聖宋名賢五百家播芳大全文粹卷二十終



